

რა უნდა ვიცოდეთ
აუცილებლად
განათლების სისტემის
შესახებ

საქართველოს
განათლებისა და
მეცნიერების
სამინისტრო



თბილისი
2012

საქართველოს განვითარებისთვის პრიორიტეტულ საკითხთა შორის ერთ-ერთი განსაკუთრებული ადგილი განათლებას უკავია. ქვეყნის მუდმივი წინსვლის საფუძველი კარგად განათლებული და პროგრესულად მოაზროვნე მომავალი თაობის აღზრდაა, ამიტომაც საქართველოს განათლებისა და მეცნიერების სამინისტრო აქტიურად ახორციელებს რეფორმებს განათლების დონის ასამაღლებლად როგორც ზოგადსაგანმანათლებლო, ასევე უმაღლეს საგანმანათლებლო დაწესებულებებში. ამჟამად განათლების სისტემაში რეფორმები 49 მიმართულებით მიმდინარეობს და კონკრეტული შედეგებიც გვაქვს. განათლების სფერო საზოგადოების დიდ ინტერესს იწვევს, ამიტომ საქართველოს განათლებისა და მეცნიერების სამინისტრომ საზოგადოების ინფორმირებისა და რეფორმირების პროცესის გამჭვირვალობის მიზნით ერთად მოუყარა თავი მთელ რიგ საკითხებს, რომლებიც გვაცნობს განათლების სისტემაში მიმდინარე რეფორმებს.

- ▶ საქართველო ჩართულია ბოლონის პროცესში და არის ლისაბონის კონვენციის მონაწილე, რაც ნიშნავს, რომ საქართველოს განათლების სისტემა (ზოგადი, პროფესიული და უმაღლესი განათლება) აბსოლუტურად შეესაბამება განათლების ევროპულ სტანდარტებს. სრული ზოგადი განათლების ატესტატი, პროფესიული კოლეჯის დიპლომი და უმაღლესი საგანმანათლებლო დაწესებულების დიპლომი აღიარებულია ევროპის ქვეყნებისა და ამერიკის შეერთებული შტატების მიერ. საერთაშორისო ორგანიზაციებმა საქართველოს განათლებისა

და მეცნიერების, შინაგან საქმეთა, თავდაცვისა და იუსტიციის სამინისტროები აღიარა ყველაზე არაკორუმპირებულ სამინისტროებად.

2011 წელს Gallup-ის მიერ საქართველოში ჩატარებული კვლევების მიხედვით, საქართველოს მოსახლეობის 69% განათლების სფეროში გატარებულ რეფორმებს მხარს უჭერს და განათლებისა და მეცნიერების სამინისტროს მათ განხორციელებაში ნდობას უცხადებს.

- ▶ საქართველოში არის 2086 საჯარო და 226 კერძო სკოლა, რომელშიც სწავლობს დაახლოებით 600000-მდე მოსწავლე და ასწავლის 59000-მდე პედაგოგი. საერთაშორისო ორგანიზაციებმა საქართველო დაასახელა იმ ქვეყნების ხუთეულში, სადაც განათლების მიღება ყველაზე ხელმისაწვდომია. საქართველო იუნესკოს განათლების საერთაშორისო ბიუროს მმართველი საბჭოს ვიცე-პრეზიდენტად ზედიზედ მეორედ აირჩიეს, რაც საქართველოს განათლების სფეროში მიმდინარე წარმატებული რეფორმების შედეგია. ბიუროს პრეზიდენტი ქვეყანა არის ნორვეგია.
- ▶ მსოფლიო ბანკის მიერ ზოგადი განათლების დაფინანსების სქემა აღიარებულია განათლების რეფორმის ერთ-ერთ წარმატებულ ნაწილად. ზოგადსაგანმანათლებლო დაწესებულებებში სწავლა ფინანსდება ვაუჩერული სისტემით. 2011 წელს განხორციელებული სასკოლო ვაუჩერის კომპონენტების ცვლილებების შედეგად საქართველოში თითოეულ საჯარო სკოლას აქვს საკმარისი თანხა სასწავლო პროცესის წარმატებულად წარმართვისთვის და არც ერთი სკოლა არ არის დეფიციტური.

ფინანსური ვაუჩერი, რომელიც სახელმწიფოს მიერ თითოეულ მოსწავლეს უსასყიდლოდ გადაეცემა განათლების მისაღებად, არის თავად მოსწავლის განკარგულებაში და მოსწავლე თვითონ იღებს გადაწყვეტილებას – სად ისწავლოს, კერძო თუ საჯარო სკოლაში.

საქართველოს სკოლების საერთო რაოდენობის 11%-ს კერძო სკოლები წარმოადგენს. კერძო სკოლებში მოსწავლეების 10% სწავლობს. ევროპის მასშტაბით, კერძო სკოლების რაოდენობით, საქართველო ერთ-ერთი ლიდერი ქვეყანაა. რაც ჩვენი სახელმწიფოს სწორი პოლიტიკის შედეგია.

- ▶ საქართველოში საჯარო სკოლა არის დეცენტრალიზებული, სკოლას მართავს სამეურვეო საბჭო, რომლის შემადგენლობაშიც არიან მშობლები, მოსწავლეები, მასწავლებლები. სამეურვეო საბჭო ამტკიცებს სკოლის ბიუჯეტსა და სკოლის შინაგანაწესს. ასევე ის ნიშნავს და ათავისუფლებს სკოლის დირექტორს. სკოლის სამეურვეო საბჭოს დირექტორობის სერტიფიცირებულ კანდიდატებს წარუდგენს განათლებისა და მეცნიერების მინისტრი.
- ▶ 2011 წელს ევროკავშირის მიერ ჩატარებულმა კვლევებმა ასეთი შედეგი მოგვცა – საქართველოს მოსახლეობის 78% თვლის, რომ სკოლებში უსაფრთხო გარემოა, რაც უსაფრთხო სკოლის კონცეფციისა და სკოლებში საგანმანათლებლო დაწესებულების მანდატურის სამსახურის ამოქმედების დამსახურებაა. მანდატურის ინსტიტუტის შემოღებით სკოლებში 94%-ით შემცირდა ძალადობის ფაქტები, 98%-ით შემცირდა ვანდალიზმი, ხოლო 97% -ით – ცივი იარაღის ტარება.

ამერიკის შეერთებული შტატების მანდატურის საერთაშორისო ასოციაციის (NASRO) დირექტორთა საბჭოს წევრებმა მაღალი შეფასება მისცეს საქართველოში საგანმანათლებლო დაწესებულების მანდატურის სამსახურის საქმიანობას და ამ სფეროში განხორციელებულ რეფორმებს, რის შედეგადაც მიიღეს გადაწყვეტილება მანდატურის სამსახურის საერთაშორისო ასოციაციაში გაწევრიანების თაობაზე.

- ▶ სამინისტროს ახალი ინიციატივით, მშობელს შეუძლია ბავშვის სკოლაში მიყვანა 5 წლის ასაკიდან. პროცესი ნებაყოფლობითია და მშობელი თავად აკეთებს არჩევანს. 2011 წელს ჩატარებულმა ეროვნულმა შეფასებამ აჩვენა, რომ 5 და 6 წლის ბავშვებმა

ერთნაირად დაძლიეს ეროვნული სასწავლო გეგმით გათვალისწინებული პროგრამა. აღსანიშნავია, რომ 2011 წელს მშობლების 52%-მა მიიღო გადანაცვეტილება ხუთი წლის ასაკიდან შეეყვანა ბავშვი სკოლაში.

- ▶ 2011 წლიდან ყველა პირველკლასელი საქართველოს პრეზიდენტისაგან საჩუქრად იღებს პერსონალურ კომპიუტერს (ნეტბუკს), რომელშიც ჩატვირთულია მრავალფეროვანი სასწავლო პროგრამები და საგანმანათლებლო თამაშები ყველა საგანში. ნეტბუკების მეშვეობით მოსწავლეები უფრო მარტივად ითვისებენ ეროვნული სასწავლო გეგმით განსაზღვრულ პროგრამას.

2011 წელს ჩატარებული ეროვნული შეფასებით დადგინდა, რომ პირველკლასელთა უმრავლესობამ წარმატებით გამოიყენა კომპიუტერი სასწავლო პროცესში და სასწავლო პროგრამა აითვისა 2-ჯერ უფრო სწრაფად, ხოლო შეფასების მაქსიმალური 30 ქულიდან 94%-მა მიიღო 24,9 ქულა, რაც საერთაშორისო შეფასების სტანდარტებით, ძალიან მაღალი მაჩვენებელია.

- ▶ 2011 წლიდან ამოქმედდა ახალი ეროვნული სასწავლო გეგმა, რომლის შექმნაშიც მონაწილეობას იღებდნენ პრაქტიკოსი პედაგოგები. ეროვნული სასწავლო გეგმა საერთაშორისო ექსპერტების და იუნესკოს მიერ აღიარებულია, როგორც სრულყოფილი და ყოვლისმომცველი დოკუმენტი.

ეროვნული სასწავლო გეგმის მიხედვით, საჯარო სკოლებში ფიზიკური კულტურის გაკვეთილები ჩანაცვლებულია სპორტის გაკვეთილებით. სკოლებში შექმნილია სასკოლო ლიგები სპორტის სხვადასხვა სახეობაში. დაინერგა ახალი საგნები: მსოფლიო კულტურა და სამოქალაქო თავდაცვა და უსაფრთხოება.

საქართველოს შინაგან საქმეთა და განათლებისა და მეცნიერების სამინისტროების ინიციატივით მე-11 კლასის მოსწავლეებს სკოლაშივე შეუძლიათ შეისწავლონ საგანი – „საგზაო ნიშნები და მოძრაობის უსაფრთხოება“. ამ საგნის მეშვეობით ავტომობილის

მართვის თეორიულ კურსს მოსწავლეები სკოლაშივე გაივლიან და გამოცდების წარმატებით ჩაბარების შემთხვევაში უფასოდ აიღებენ მართვის მოწმობას.

- ▶ 2011 წელს დაიწყო და 2012 წელს დასრულდება სასკოლო სახელმძღვანელოების რეფორმა. ახალი ეროვნული სასწავლო გეგმის მიხედვით I-VI კლასების ჩათვლით შეიქმნა ახალი სახელმძღვანელოები, რომლებიც გამოირჩევა მაღალი სტანდარტით, ხარისხით და მათი საცალო ფასი არ აღემატება 10 ლარს. 2012-2013 სასწავლო წლიდან ასევე ეროვნული სასწავლო გეგმის მიხედვით შექმნილი სახელმძღვანელოები შვეა VII-XII კლასებში და მათი ფასიც არ იქნება 10 ლარზე მეტი. ახალი, გრიფირებული სახელმძღვანელოები არ შეიცვლება ხუთი წლის განმავლობაში.

სოციალურად დაუცველი ყველა მოსწავლე I-XII კლასის ჩათვლით სახელმწიფოსგან საჩუქრად იღებს უფასო სახელმძღვანელოებსა და სასწავლო რვეულების კომპლექტს.

- ▶ 2011 წლიდან სკოლებში ინგლისური ენა პირველი კლასიდან ისწავლება. ეროვნული შეფასების შედეგებით, პირველკასელებმა წარმატებით აითვისეს ინგლისური ენის სასწავლო გეგმით დადგენილი პროგრამა. მოსწავლეები ინგლისურ ენას სწავლობენ მსოფლიოს ერთ-ერთი უმსხვილესი საგამომცემლო სახლის „მაკ მილანის“ სახელმძღვანელოებით.
- ▶ საქართველოში 2012 წლის იანვრიდან ამოქმედდა განათლებისა და მეცნიერების სამინისტროს ელექტრონული წიგნების ბიბლიოთეკა. ბიბლიოთეკაში თავმოყრილია მრავალფეროვანი და საჭირო სახელმძღვანელოები როგორც მასწავლებლებისთვის, ასევე მოსწავლეებისთვისაც. მსოფლიოს ერთ-ერთ უდიდეს კორპორაცია „Intel“-თან თანამშრომლობით ამოქმედდა პროექტი Skool.ge, სადაც თავმოყრილია დამხმარე ელექტრონული მასალები მათემატიკაში, ფიზიკაში, ქიმიაში და ბიოლოგიაში.

ქართველი მოსწავლეებისთვის შეიქმნა და ფუნქციონირებს ელექტრონული რესურსები: www.buki.ge, www.skool.ge, www.el.ge.

- ④ 2010 წელიდან საქართველოში წარმატებით ხორციელდება პროგრამა – „ასწავლე და ისწავლე საქართველოსთან ერთად“ (“Teach and Learn with Georgia”), რომლის ფარგლებში საქართველოს მასშტაბით ქართველ პედაგოგებთან ერთად ინგლისურ ენას ასწავლიან მასწავლებლები აშშ-დან, კანადიდან, დიდი ბრიტანეთიდან და ავსტრალიიდან. ბოლო ორი წლის განმავლობაში ამ პროგრამაში 2500-ზე მეტმა ინგლისურენოვანმა პედაგოგმა მიიღო მონაწილეობა. რეფორმის შედეგად სკოლებში მკვეთრად გაიზარდა ინგლისური ენის ცოდნის დონე, რაც სკოლის გამოსაშვები გამოცდებისა და ერთიანი ეროვნული გამოცდების შედეგებზეც აისახა.
- ④ 2012 წლიდან ამოქმედდა პროგრამა „ქართული ენა მომავალი წარმატებისთვის“, რომელიც გულისხმობს ქართული ენის გაძლიერებულად სწავლებას ქვემო ქართლსა და სამცხე ჯავახეთში. 500-მდე ქართველი მოხალისე პედაგოგი ქართულ ენასა და ლიტერატურას არაქართულენოვან სკოლებში ქართული ენისა და ლიტერატურის ახალი, თანამედროვე სტანდარტებით შექმნილი, სახელმძღვანელოებით ასწავლიან. მოხალისეები ცხოვრობენ ადგილობრივ ოჯახებში და მოსახლეობასაც ეხმარებიან ქართული ენის შესწავლაში. პროგრამის ამოქმედებისა და განხორციელების შემდეგ 230-ჯერ გაიზარდა ეთნიკური უმცირესობების იმ წარმომადგენელთა რაოდენობა, ვინც სურვილი გამოთქვა, სწავლა გააგრძელოს საქართველოს უმაღლეს სასწავლებლებსა და პროფესიულ კოლეჯებში. ქართული ენის შესწავლის მიზნით დაარსდა „ქართული ენის სახლები“.
- ④ გამორჩეული და წარმატებული სწავლისათვის სკოლის მოსწავლეების ნახალისება სხვადასხვა ფორმით ხორციელდება. მოსწავლეები, რომლებიც საშუალო საფეხურზე გათვალისწინებულ საგნებს დაძლევენ ათი ქულით გადაეცემათ ოქროსა და ვერცხლის მედლები და ატესტატი, ხოლო საბაზო საფეხურის სრულ ათოსან

მოსწავლეებს საქართველოს პრეზიდენტი საჩუქრად პერსონალურ კომპიუტერს გადასცემს.

მოსწავლეებს ეროვნულ სასკოლო ოლიმპიადებში წარმატებული მონაწილეობით შესაძლებლობა ეძლევათ მოიპოვონ დიპლომი და ფულადი ჯილდო, რომელიც განისაზღვრება 1000, 700 და 500 ლარის ოდენობით.

წარჩინებულ მოსწავლეებს ასევე შეუძლიათ უფასოდ დაისვენონ საზაფხულო ბანაკებში. ასეთ ბანაკებში გასულ წელს 600 მოსწავლე ისვენებდა. მათგან 120 წარჩინებული მოსწავლე ინგლისური ენის შესასწავლად დიდ ბრიტანეთში გაემგზავრა.

სახელმწიფო ასევე აქტიურად უწყობს ხელს მოსწავლეების მონაწილეობას საერთაშორისო ოლიმპიადებში. 2010 წლიდან ჩვენი მოსწავლეები ყველა საერთაშორისო ოლიმპიადიდან საპრიზო ადგილებით ბრუნდებიან. ისინი განსაკუთრებულ წარმატებებს მათემატიკასა და საინფორმაციო ტექნოლოგიების მიმართულებით აღწევენ. მათი წახალისება ხდება დიპლომით და ფულადი ჯილდოთი, რომელიც განისაზღვრება 5000, 3000 და 2000 ლარის ოდენობით.

ასევე, 2012 წელს ამოქმედდება განათლებისა და მეცნიერების სამინისტროსა და ევროპული ბირთვული კვლევების ორგანიზაციის (CERN) მიერ ორგანიზებული საერთაშორისო საზაფხულო ბანაკები, სადაც მოსწავლეები CERN-ში მოღვაწე მეცნიერების ხელმძღვანელობით საბუნებისმეტყველო საგნებში და საინფორმაციო ტექნოლოგიებში გაიღრმავებენ ცოდნას.

2011 წლიდან წარმატებით იმართება მოსწავლე-გამომგონებელთა საერთაშორისო კონკურსი „ლეონარდო და ვინჩი“.

- ▶ 2010 წლიდან აღდგენილია ფიზიკა-მათემატიკის სპეციალიზებული სკოლები, სადაც გაძლიერებულად ისწავლება ზუსტი და საბუნებისმეტყველო საგნები.

- ▶ 2012 წლის განმავლობაში აშენდება 23 ახალი სკოლა და სარემონტო სამუშაოები 600-მდე სკოლას ჩაუტარდება.

ევროპის მასშტაბით ერთ მოსწავლეზე კომპიუტერების რაოდენობით საქართველო მაღალი მაჩვენებლით გამოირჩევა (ერთი კომპიუტერი – 7 მოსწავლეზე), ხოლო საქართველოს ყველა საჯარო და კერძო სკოლა ჩართულია ინტერნეტის ქსელში. წელს სკოლებში დამატებით იქნება შეტანილი 11000 ახალი კომპიუტერი და 1500 SCHOOL BOX (თანამედროვე აპარატურა, რომელიც უზრუნველყოფს სტაბილურ კავშირს სკოლასა და ცენტრალურ სერვერს შორის. ასევე საშუალებას აძლევს სკოლას ჰქონდეს ლოკალური ელექტრონული სერვისები)

საქართველოს ყველა ქალაქისა თუ რაიონული ცენტრის სკოლაში დამონტაჟებულია ფიზიკის, ქიმიისა და ბიოლოგიის თანამედროვე ლაბორატორიები.

საჯარო სკოლებს გადაეცემა 200 000 ახალი მერხი და 5000 ახალი დაფა.

2012 წელს საქართველოს 100 სკოლაში გაიხსნება ულტრათანამედროვე ტექნოლოგიებით და აპარატურით აღჭურვილი „მომავლის კლასები“.

- ▶ სრული ზოგადი განათლების ატესტატის მისაღებად საქართველოს ყველა მეთორმეტეკლასელი აბარებს საატესტატო გამოცდას რვა საგანში: ქართულ ენასა და ლიტერატურაში, უცხო ენაში, მათემატიკაში, ქიმიაში, ფიზიკაში, ბიოლოგიაში, ისტორიასა და გეოგრაფიაში.

სკოლის გამოსაშვები გამოცდები ტარდება კომპიუტერის მეშვეობით – Computer Adaptive Testing – CAT-ის მეთოდით. საერთაშორისო ორგანიზაციის CITO-ს შეფასებით საქართველო ერთ-ერთი ლიდერი ქვეყანაა, სადაც სასკოლო გამოცდები ყველაზე თანამედროვე ტექნოლოგიებით ტარდება.

➤ მასწავლებლების სერტიფიცირების პროცესი 2014 წლამდე ნებაყოფლობითია. 2014 წლიდან სერტიფიცირება სავალდებულო გახდება და საჯარო სკოლაში მხოლოდ სერტიფიცირებული მასწავლებლები იმუშავებენ.

- სერტიფიცირებული პედაგოგები იღებენ ხელფასზე დანამატს 75 ლარის ოდენობით;
- კომპიუტერისა და ინგლისური ენის გამოცდის ჩაბარების შემთხვევაში დამატებით – 125 ლარს;
- საბუნებისმეტყველო საგნების პედაგოგებს ლაბორატორიული გამოცდის წარმატებით ჩაბარების შემთხვევაში ხელფასზე დანამატი განესაზღვრებათ 75 ლარით;
- სერტიფიცირების საუკეთესო შედეგის მქონე მასწავლებლების 25%-ის ხელფასი არის 1000 ლარი.
- მენტორ მასწავლებლის ხელფასზე დანამატი არის 180 ლარი.
- ბილინგვურ სწავლებაში ჩართულ პედაგოგებს ხელფასზე დანამატის სახით ეძლევათ 200 ლარი;
- პროგრამაში – „ასწავლე საქართველოსთვის“ ჩართული პედაგოგების ხელფასზე დანამატია 500 ლარი;

სახელმწიფო ზრუნავს მასწავლებლის პროფესიულ განვითარებაზე. თბილისსა და ქუთაისში არსებული „მასწავლებლის სახლების“ მუშავებით ყველა პედაგოგს აქვს შესაძლებლობა უფასოდ გაიაროს კვალიფიკაციის ასამაღლებელი კურსები. წლის ბოლომდე „მასწავლებლის სახლი“ გაიხსნება ახალციხეში, ბათუმსა და ზუგდიდში.

სახელმწიფო კვალიფიკაციის ასამაღლებლად მასწავლებლებს აგზავნის დიდ ბრიტანეთში, სადაც ისინი ინგლისური ენის სწავლების ინტენსიურ კურსს გადიან, ხოლო ფიზიკის მასწავლებლები მსოფლიოში ცნობილ საერთაშორისო სამეცნიერო ცენტრში (ევროპული ბირთვული კვლევების ორგანიზაცია CERN) იმაღლებენ კვალიფიკაციას.

საქართველოს ყველა საჯარო სკოლის მასწავლებლისთვის ხელმისაწვდომია პროფესიული საინფორმაციო და

საგანმანათლებლო ინტერნეტგაზეთი www.mastsavlebeli.ge. გარდა ამისა, საქართველოს ყველა საჯარო სკოლა საჩუქრად იღებს განათლებისა და მეცნიერების სამინისტროს მასწავლებელთა პროფესიული განვითარების ეროვნული ცენტრის მიერ გამოცემულ ჟურნალ „მასწავლებელს“.

საქართველოს საჯარო სკოლის ყველა მასწავლებელი დაზღვეულია სახელმწიფოს მიერ.

- ▶ სახელმწიფო ხელს უწყობს ინკლუზიური სწავლების განვითარებას, რაც აღიარებულია ნორვეგიის მთავრობის მიერ, რომელიც აქტიურ დახმარებას უწევს ჩვენს ქვეყანას ამ მიმართულებით რეფორმის განხორციელებაში.
- ▶ 2012 წლიდან საქართველოს ყველა მოქალაქე, რომელსაც სურვილი ექნება კერძო თუ სახელმწიფო პროფესიულ კოლეჯში შეისწავლოს ახალი პროფესია, სახელმწიფოსაგან მიიღებს 1000-ლარიან ვაუჩერს. ფინანსური ვაუჩერის მიღება განათლებისა და მეცნიერების სამინისტროს პროფესიული კოლეჯების საინფორმაციო ცენტრის მეშვეობით ხდება.

2012 წელს 5 ახალი პროფესიული კოლეჯი გაიხსნება. აქედან – ორი თბილისში, ხოლო დანარჩენი – ამბროლაურში, ქობულეთსა და ოზურგეთში.

საქართველოში პროფესიული განათლების მიღების შემდეგ დასაქმებულთა რაოდენობამ სტატისტიკურად 64% შეადგინა.

აღსანიშნავია, რომ პროფესიული განათლების სტრატეგია ევროპული სტანდარტების გათვალისწინებითა და ევროკავშირის დახმარებით შეიქმნა.

ორ პროფესიულ კოლეჯში (კაჭრეთი, ქობულეთი) მოქმედებს უფასო საცხოვრებელი სტუდენტებისთვის, რათა მაღალმთიანი

რაიონის წარმომადგენლებსაც მიეცეთ შესაძლებლობა
შეისწავლონ ახალი პროფესიები.

თითოეული პროფესიული კოლეჯი აღჭურვილია თანამედროვე
აპარატურით და პასუხობს ახალი პროფესიების ათვისების
თანამედროვე მოთხოვნებს.

- ▶ საქართველოს განათლებისა და მეცნიერების სამინისტროს
ინიციატივით ახალი პროგრამა „პროფესიული გადამზადებისა
და პროფესიული ორიენტაციის ტრენინგები“ ამოქმედდება,
რომლის ფარგლებშიც საქართველოს მასშტაბით ოც ქალაქში
ერთდროულად 20 000 ადამიანს ჩაუტარდება უფასო ტრენინგები.
პროგრამის მონაწილეები ინგლისურ ენაში, კომპიუტერულ უნარ-
ჩვევებსა და პროფესიულ ორიენტაციაში გადამზადდებიან.
- ▶ უმაღლეს საგანმანათლებლო დაწესებულებაში ჩასარიცხად
აბიტურიენტი აბარებს 4 მისაღებ გამოცდას – ქართულ ენაში, უცხო
ენაში, ზოგად უნარებსა და ერთ გამოცდას არჩეული ფაკულტეტის
შესაბამისად. მსოფლიო ბანკმა ეროვნული გამოცდები ერთ-ერთ
ყველაზე წარმატებულ რეფორმად აღიარა საქართველოში.

აბიტურიენტის გამოცდებზე მიღებული შედეგებიდან და
პრიორიტეტული პროფესიების შერჩევიდან გამომდინარე
სახელმწიფო სტუდენტის სწავლებას აფინანსებს 100, 70, 50 და
30 პროცენტიანი გრანტებით. პრიორიტეტი საბუნებისმეტყველო,
საინჟინრო და ზუსტ მეცნიერებათა ფაკულტეტებს ენიჭებათ.

რეფორმის შედეგებიდან გამომდინარე 2011 წელს 102%-ით
გაიზარდა მოთხოვნა საინჟინრო ფაკულტეტებზე, ხოლო 46%-ით
– ზუსტ და საბუნებისმეტყველო ფაკულტეტებზე.

აღსანიშნავია, რომ ევროპასა და პოსტსაბჭოთა სივრცეში,
უმაღლესი განათლების მიღების მხრივ, საქართველო სწავლის
ერთ-ერთი ყველაზე დაბალი საფასურის მქონე ქვეყანაა.

უმაღლეს საგანმანათლებლო დაწესებულებებში სწავლის დასაფინანსებლად სოციალურად დაუცველი სტუდენტებისთვის სახელმწიფო გამოყოფს დამატებით დაფინანსებას.

- ▶ აზერბაიჯანულენოვანი და სომხურენოვანი საქართველოს მოქალაქე აბიტურიენტები უმაღლეს სასწავლებლებში ჩარიცხვისას მხოლოდ ზოგადი უნარების გამოცდას აბარებენ (აზერბაიჯანულ ან სომხურ ენაზე) და ჩარიცხებიან მათთვის სასურველ უმაღლეს საგანმანათლებლო დაწესებულებებში. ისინი ერთი სასწავლო წლის მანძილზე გადიან ქართული ენის ინტენსიურ საგანმანათლებლო პროგრამას და მომდევნო სასწავლო წლიდან უკამოცდოდ აგრძელებენ ქართულად სწავლას სასურველ ფაკულტეტზე.
- ▶ 2012 წლიდან მსოფლიოს წამყვანი უნივერსიტეტებიდან მონვეული 40 პროფესორი ლექციებს წაიკითხავს ივანე ჯავახიშვილის სახელობის თბილისის სახელმწიფო უნივერსიტეტში, საქართველოს ტექნიკურ უნივერსიტეტში, თბილისის სახელმწიფო სამედიცინო უნივერსიტეტსა და ილიას სახელმწიფო უნივერსიტეტში.
- ▶ უცხოეთის მოქალაქეების მხრიდან საქართველოში უმაღლესი განათლების მიღების მსურველთა რაოდენობა 300%-ით გაიზარდა.
- ▶ განათლებისა და მეცნიერების სამინისტრო წარმატებულ სტუდენტებს მსოფლიოს წამყვანი უმაღლესი სასწავლებლების მაგისტრატურაში სწავლებასა და ცხოვრებას უფინანსებს. ამ პროგრამის მიხედვით 2011 წლის ბოლოსთვის 400-მდე ქართველმა სტუდენტმა მიიღო განათლება.
- ▶ 2012 წლიდან საქართველოში სახელმწიფოს მიერ დაფუძნებული უმაღლესი საგანმანათლებლო დაწესებულებები არასამეწარმეო (არაკომერციული) იურიდიული პირის სახით არსებობენ, რაც ნიშნავს მათ მეტ დამოუკიდებლობას, მოქნილობასა და ავტონომიურობას.

- ▶ 2012 წლის სექტემბრიდან ქალაქ ბათუმში საერთაშორისო ტექნოლოგიური უნივერსიტეტი ამოქმედდება, რომელიც იქნება წამყვანი ამერიკული უნივერსიტეტის ფილიალი და რომლის ინფრასტრუქტურის მშენებლობაც ამჟამად მიმდინარეობს.
- ▶ საქართველოს სახელმწიფო მეცნიერების განვითარებისა და სამეცნიერო კვლევების ხელშესაწყობად ყოველწლიურად 24 მილიონ ლარს გამოყოფს.

საერთაშორისო სამეცნიერო ცენტრის (ევროპული ბირთვული კვლევების ორგანიზაცია) CERN-ის მუშაობაში მონაწილეობას ქართველი მეცნიერები იღებენ. ჩვენი ქვეყნის თანამონაწილეობა მსოფლიოს ამ ყველაზე გლობალურ სამეცნიერო კონსორციუმში ფარდობითი მაჩვენებლით მსოფლიოს მასშტაბით პირველ ხუთეულშია.

- ▶ სტუდენტთა დასაქმების პროექტის ფარგლებში 2012 წლის 20 ივლისიდან 20 აგვისტოს ჩათვლით ყველა ავტორიზებული უმაღლესი სასწავლო დაწესებულების ბაკალავრიატის 25000 სტუდენტი დასაქმდება. სტუდენტები ერთი თვის განმავლობაში 500 ლარის ოდენობით ანაზღაურებას მიიღებენ. ახალგაზრდები სახელმწიფო დაწესებულებებში, კერძო სექტორში, იურიდიულ კომპანიებში, მუზეუმებში, სამედიცინო დაწესებულებებსა და თვითმმართველობის ორგანოებში სხვადასხვა სამუშაო ადგილზე დასაქმდებიან. პროგრამაში ჩართვის მსურველებს რეგისტრაციის გავლა შეეძლებათ ელექტრონულ მისამართზე: www.summerjob.ge.

პროგრამის განხორციელება მნიშვნელოვანია, რათა სტუდენტთა საზაფხულო დასაქმების პრაქტიკა დასავლეთის წამყვანი ქვეყნების მსგავსად საქართველოშიც დაინერგოს.

